

Na osnovu člana 20. Zakona o slobodnim zonama u Bosni i Hercegovini ("Službeni glasnik BiH", broj 99/09) i člana 61. stav (2) Zakona o upravi ("Službeni glasnik BiH", broj 32/02), ministar vanjske trgovine i ekonomskih odnosa donosi

UPUTU

O OBLIKU, SADRŽAJU I DRUGIM USLOVIMA KOJE TREBA SADRŽAVATI IZVJEŠTAJ O RADU SLOBODNIH ZONA U BOSNI I HERCEGOVINI

I - OSNOVNE ODREDBE

Član 1. (Djelokrug primjene)

Ovom Uputom bliže se utvrđuje forma, sadržaj i drugi uslovi koje treba sadržavati Izvještaj o radu (u daljnjem tekstu: Izvještaj).

Član 2. (Definicije)

(1) U primjeni ove Upute pojmovi imaju slijedeće značenje:

a) Izvještaj o rezultatima poslovanja u slobodnoj zoni je izvještaj koji osnivač slobodne zone dostavlja svake godine Ministarstvu vanjske trgovine i ekonomskih odnosa Bosne i Hercegovine (u daljnjem tekstu: Ministarstvo) o rezultatima poslovanja u slobodnoj zoni do kraja marta tekuće godine za prethodnu godinu (u daljnjem tekstu: Izvještaj osnivača);

b) Izvještaj o rezultatima poslovanja svih slobodnih zona u Bosni i Hercegovini je izvještaj koji Ministarstvo dostavlja svake godine Vijeću ministara Bosne i Hercegovine o rezultatima poslovanja svih slobodnih zona do kraja aprila tekuće godine (daljnjem tekstu: Izvještaj ministarstva).

II - OBLIK I SADRŽAJ IZVJEŠTAJA

Član 3. (Oblik izvještaja)

(1) U skladu s članom 14. stav (1) Zakona o slobodnim zonama u Bosni i Hercegovini ("Službeni glasnik BiH", broj 99/09) (u daljnjem tekstu: Zakon), osnivač slobodne zone dostavlja Izvještaj osnivača na propisanom obrascu (Obrazac I) koji je sastavni dio ove

Upute.

(2) U skladu s članom 14. stavom (2) Zakona, Ministarstvo dostavlja Izvještaj ministarstva na propisanom obrascu (Obrazac II) koji je sastavni dio ove Upute.

Član 4. (Sadržaj izvještaja)

(1) Izvještaj iz člana 2. stav (1) tačke a) ove Upute sadrži:

- a) podatke o osnivaču;
- b) broj i naziv korisnika slobodne zone (u daljnjem tekstu: zona);
- c) vrijednost uvezene robe iz inostranstva u zonu;
- d) vrijednost uvezene robe iz Bosne i Hercegovine u zonu;
- e) vrijednost proizvedene robe u zoni;
- f) vrijednost robe izvezene u inostranstvo;
- g) vrijednost robe izvezene na domaće tržište;
- h) izjavu pod punom moralnom, materijalnom i krivičnom odgovornosti da su dati podaci tačni;
- i) potpis i pečat osnivača.

(2) Izvještaj iz člana 2. stav (1) tačke b) ove Upute sadrži:

- a) broj i naziv slobodne zone;
- b) vrijednost uvezene robe iz inostranstva u zonu;
- c) vrijednost uvezene robe iz Bosne i Hercegovine u zonu;
- d) vrijednost proizvedene robe u zoni;
- e) vrijednost robe izvezene u inostranstvo;
- f) vrijednost robe izvezene na domaće tržište;
- g) obrazloženje o ekonomskoj opravdanosti postojanja slobodne zone.

III - KONTROLA I NADZOR

Član 5.

(Vršenje kontrole i nadzora)

(1) Poslove kontrole i nadzora nad primjenom odredbi ove Upute obavlja Sektor za carinsku politiku i tarife (u daljnjem tekstu: Sektor).

(2) U skladu s članom 14. stav (2) Zakona Sektor je dužan, prije podnošenja Izvještaja ministarstva Vijeću ministara, izvršiti kontrolu poštivanja propisa od strane osnivača koje se odnose na rad zona, kao i u ostalim slučajevima kada se ukaže potreba.

(3) U vršenju poslova kontrole iz stava (2) ovog člana Sektor je ovlašten tražiti uvid u dokumentaciju, poslovne knjige i druge isprave vezane za rad zona, kao i dostavljanje svih podataka i informacija koje namjerava razmatrati.

(4) U vršenju nadzora iz stava (1) ovog člana Sektor je ovlašten izvršiti uvid u dokumentaciju i druge isprave vezane za rad i primjenu relevantnih propisa u vezi zona od strane Uprave za indirektno oporezivanje Bosne i Hercegovine (u daljnjem tekstu: Uprava) i njenih organizacijskih jedinica u svim slučajevima kada se ukaže potreba, kao i dostavljanje svih podataka i informacija koje namjerava razmatrati.

Član 6. (Informacija o nadzoru)

O utvrđenom stanju nakon izvršenog nadzora Ministarstvo sačinjava Informaciju o nadzoru koju dostavlja Vijeću ministara Bosne i Hercegovine na usvajanje.

IV - PRIJELAZNE I ZAVRŠNE ODREDBE

Član 7. (Stupanje na snagu)

(1) Ova Uputa stupa na snagu osmog dana od dana objavljivanja u "Službenom glasniku BiH".

Broj 04-1-02-1903/10
20. maja 2010. godine

Ministar
Mladen Zirojević, s. r.